



osbe Organizata për Siguri dhe
Bashkëpunim në Evropë
Misioni në Kosovë



KUJDES! ÇMOJE JETËN!


**Aksidentet nuk ndodhin,
ato shkaktohen!**



**Shpejtësia është shkaktari më i madh i aksidenteve në trafik. Ajo vret!
Mos shpejto. E ke vetëm një jetë!**



Në çdo automjet, në çdo udhëtim, rripi i sigurisë dhe ulësja për fëmijë mund të shpëtojnë jetë. Vendosja e rripit të sigurisë dhe ulëses për fëmijë janë të obliguara me ligj!



Drejtimi i automjetit nën ndikimin e alkoolit dhe përdorimi i telefonit gjatë drejtimit mund të ndërpresin jetë. Duaje jetën tënde dhe respekto jetën e tjetrit!



Shfrytëzo vendkalimet për këmbësorë dhe ec nëpër trotuare. Në rrugët pa trotuare, ec në anën e majtë! Shiko majtas e djathtas dhe mos u ngut! Kujdesi shpëton jetë!



“ Thënia "një çast mund ta ndryshoj të ardhmen" tani më është kalitur në mendje, sepse pikërisht kështu ndodhi me mua.

Si 17 vjeçar, në kohën më të mirë të rinisë, u gjenda në vend të gabuar, në një veturë të shpejtë me shofer pa patent, të pakujdesshëm dhe që nuk respektonte pothuajse asnjë shenjë të trafikut. Asnjëri nga tre shokët nuk kishim vënë rripin e sigurisë. Nga tejkalimet e shpejta humbëm kontrollin dhe u aksidentuam.

Edhe pse isha ulur prapa, lëndimet e mia ishin të tmerrshme dhe me pasoja të përjetshme. Tani ishte vonë për kujdes, gjithçka ndryshoj përgjithmonë!

Aksidenti ndodhi derisa po bëja plane për të ardhmen. Merresha me sport, dhe shkollohesha që një ditë të bëhem polic trafiku.

Nëntë vite më pas, ende ballafaqohem me sfida të mëdha shëndetësore, shpirtërore, dhe emocionale, por përkundër të gjithave, jam munduar t'i kthehem jetës time si çdo person tjetër. Tani jam student i shkencave kompjuterike dhe që tre vite, shofer i kujdesshëm në trafik.

Sot, ju bëj apel të gjithëve të kontribuojnë për siguri më të madhe në rrugë, sepse nesër mund të jetë shumë vonë!

Elmi Fazliu





Koha është të mendojmë!

Jetën e Milot Bajramit, shokut tim të mirë Milit, nuk e kthen askush...fatkeqsisht. Jeta e Milit u shua në prehrin tim për shkak të një të riu i cili ishte duke vozitur veturën e tij të shtrenjtë me shpejtësi të madhe në mes të Prishtinës, në gjendje të dehur.

Nëse ai i ri do t'i mendonte pasojat që do t'i ketë vozitja në gjendje të dehur, Mili ndoshta do të ishte gjallë. Nëse ai i ri do t'i mendonte pasojat e vozitjes me shpejtësi më të lartë se që ishte e lejueshme, Mili ndoshta do të ishte gjallë. Nëse ai i ri që e ka marrë jetën e Milit gjykohet shpejt dhe drejt, ndoshta për të afërmit e Milit kjo dhimbje do të lehtësohej sadopak.

Jam e bindur se nëse të gjithë ne do t'i mendonim pasojat e pakujdesive tona në trafik, do të ulej numri i viktimave të trafikut...dhe rrjedhimisht do t'i kursenim shumë njerëz nga vuajtja, dhimbja e pikëllimi.

TASH është koha që të mendojmë!

Renea Behluli

